

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১২৩/২০১৭

ঢাকা, বুধবার ২১ জুন ২০১৭, ৭ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। একনেকে ৩০ হাজার কোটি টাকার ১২ প্রকল্প অনুমোদন
- ২। শিশুশ্রম বন্ধে সম্মিলিত প্রচেষ্টা আবশ্যিক : রাষ্ট্রপতি
- ৩। কেন্দ্রীয় ব্যাংকের চুরি যাওয়া ৬৬ মিলিয়ন মার্কিন ডলার এখনও উদ্ধার করা যায়নি  
: সংসদে অর্থমন্ত্রী
- ৪। চাল আমদানিতে শুল্ক হার কমে ১০ শতাংশ হচ্ছে : বাণিজ্যমন্ত্রী
- ৫। রেলের আসছে আরও ৫০ কোচ এবং ৪ রিলিফ ট্রেন : রেলমন্ত্রী
- ৬। পূর্বাচলে ৭০ হাজার ফ্ল্যাট নির্মাণ করা হবে : গণপূর্তমন্ত্রী  
বস্তিবাসীদের জন্য ভাড়াভিত্তিক স্বল্প মূল্যের ফ্ল্যাট নির্মাণের কাজ চলছে
- ৭। পাহাড় ধসের ঘটনা এড়াতে পাহাড় কাটা বন্ধ করা হবে : ত্রাণমন্ত্রী
- ৮। প্রধানমন্ত্রীকে জাতিসংঘের সাধারণ পরিষদের 'সার্কেল অব লিডার' বৈঠকে আমন্ত্রণ জানানো হবে  
জাতিসংঘের মহাসচিবের সাথে বাংলাদেশের পররাষ্ট্র সচিবের সাক্ষাৎ
- ৯। গণতন্ত্র, উন্নয়ন ও শান্তির পথে জয়ী হতে হলে চ্যালেঞ্জ  
মোকাবিলা করে এগিয়ে যেতে হবে : তথ্যমন্ত্রী
- ১০। আগামী শুক্র ও শনিবার পোশাক শিল্প এলাকার ব্যাংক খোলা
- ১১। ৩৮তম বিসিএসের আবেদন শুরু ১০ জুলাই : পদ ২০২৪টি

১। একনেকে ৩০ হাজার কোটি টাকার ১২ প্রকল্প অনুমোদন

শতভাগ পল্লি বিদ্যুতায়নের জন্য বিতরণ নেটওয়ার্ক সম্প্রসারণসহ ১২ প্রকল্পের চূড়ান্ত অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। এসব প্রকল্প বাস্তবায়নে মোট ব্যয় ধরা হয়েছে ৩০ হাজার ৩৪৩ কোটি ২২ লাখ টাকা। এর মধ্যে সরকারি তহবিল থেকে ২৫ হাজার ৯০৪ কোটি ৪৩ লাখ টাকা, বাস্তবায়নকারী সংস্থা থেকে ৩৩ কোটি ৮০ লাখ টাকা এবং বৈদেশিক সহায়তা থেকে পাওয়া যাবে ৪ হাজার ৪০৪ কোটি ৯৯ লাখ টাকা। গতকাল ২০ জুন মঙ্গলবার রাজধানীর শেরেবাংলা নগরে এনইসি সম্মেলন কক্ষে একনেক চেয়ারপারসন ও প্রধানমন্ত্রী শেখ হাসিনার সভাপতিত্বে অনুষ্ঠিত একনেক বৈঠকে এসব প্রকল্প অনুমোদন দেওয়া হয়। সূত্র-সংবাদ (শেষ পৃ.,ক.৪), ইনকিলাব (শেষ পৃ.,ক.৫), অবজারভার (পৃ.১,ক.৬), ইন্ডিপেনডেন্ট (পৃ.৯,ক.২)।

২। শিশুশ্রম বন্ধে সম্মিলিত প্রচেষ্টা আবশ্যিক : রাষ্ট্রপতি

রাষ্ট্রপতি মো. আবদুল হামিদ শিশুশ্রম বন্ধের লক্ষ্যে শিশুবান্ধব পরিবেশ নিশ্চিত করতে অভিভাবক, সুশীল সমাজ, গণমাধ্যম ও মানবাধিকার সংস্থাগুলোর প্রতি আহ্বান জানিয়েছেন। তিনি বলেন, প্রচলিত বা অপ্রচলিত এবং কর্মমুখী শিক্ষার মাধ্যমে প্রতিটি শিশুকে একজন আদর্শ জনসম্পদ হিসেবে গড়ে তুলতে সম্মিলিত প্রচেষ্টা আবশ্যিক। বিশ্ব শিশুশ্রম প্রতিরোধ দিবস উপলক্ষে গতকাল ২০ জুন মঙ্গলবার রাজধানীর একটি হোটেলে আয়োজিত অনুষ্ঠানে তিনি এ কথা বলেন। সূত্র-সমকাল (পৃ.৫,ক.১), সংবাদ (শেষ পৃ.,ক.৫), অবজারভার (পৃ.৩,ক.২), ডেইলি সান (পৃ.২,ক.২)।

৩। কেন্দ্রীয় ব্যাংকের চুরি যাওয়া ৬৬ মিলিয়ন মার্কিন ডলার এখনও উদ্ধার করা যায়নি : সংসদে অর্থমন্ত্রী

বাংলাদেশ ব্যাংক থেকে চুরি যাওয়া ১০১ মিলিয়ন মার্কিন ডলার এর মধ্যে ৬৬.৩৭ মিলিয়ন মার্কিন ডলার এখনও পাওয়া যায়নি বলে জানিয়েছেন অর্থমন্ত্রী আবুল মাল আবদুল মুহিত। তবে এ অর্থ উদ্ধারে বাংলাদেশ ব্যাংক, বাংলাদেশ ফাইন্যান্সিয়াল ইন্টেলিজেন্স ইউনিট, অর্থ মন্ত্রণালয়, অ্যাটার্নি জেনারেল কার্যালয়, পররাষ্ট্র মন্ত্রণালয়, বাংলাদেশ পুলিশের অপরাধ তদন্ত বিভাগসহ সব সংস্থা একযোগে কাজ করছে বলে জানান তিনি। এদিকে হাওড়ের উন্নয়নে পৃথক অর্থনৈতিক অঞ্চল প্রতিষ্ঠার পরিকল্পনা গ্রহণ করা হয়েছে বলে জানান অর্থমন্ত্রী। হাওড়বাসির বিকল্প কর্মসংস্থানের লক্ষ্যে এটি করার পরিকল্পনা রয়েছে বলে জানান তিনি। গতকাল ২০ জুন মঙ্গলবার জাতীয় সংসদে এক প্রশ্নোত্তর পর্বে তিনি এসব তথ্য জানান। সূত্র-ইনকিলাব (পৃ.১,ক.৭), সংবাদ (শেষ পৃ.,ক.৪), ইন্ডিপেনডেন্ট (পৃ.১,ক.১), অবজারভার (পৃ.১৭,ক.১)।

৪। চাল আমদানিতে শুল্ক হার কমে ১০ শতাংশ হচ্ছে : বাণিজ্যমন্ত্রী

কয়েকদিনের মধ্যে চালের দাম কেজি প্রতি ৬ টাকা করে কমবে বলে জানিয়েছেন বাণিজ্যমন্ত্রী তোফায়েল আহমেদ। তিনি বলেন, প্রধানমন্ত্রীর নির্দেশে চাল আমদানির শুল্ক হার ২৮ শতাংশ থেকে কমিয়ে ১০ শতাংশ করা হয়েছে। এখন পর্যন্ত চাল আমদানিতে ২৫ শতাংশ আমদানি শুল্কের সঙ্গে ৩ শতাংশ রেগুলেটরি ডিউটি (আরডি) দিতে হয়। সেখানে সরকার আমদানি শুল্ক কমিয়ে ১০ শতাংশ করেছে এবং রেগুলেটরি ডিউটি সম্পূর্ণ বাদ দেওয়া হচ্ছে। দু-একদিনের মধ্যেই শুল্ক কমানোর আদেশ জারি করা হবে। ফলে কয়েকদিনের মধ্যে চালের দাম কমে আসবে বলে আশা প্রকাশ করেছেন তিনি। গতকাল ২০ জুন মঙ্গলবার সচিবালয়ে বাণিজ্য মন্ত্রণালয়ের সভাকক্ষে অনুষ্ঠিত প্রতিযোগিতা আইন-২০১২ বিষয়ে এক অবহিতকরণ কর্মশালায় তিনি এ তথ্য জানান। সূত্র-সংবাদ (পৃ.১,ক.৫), যুগান্তর (শেষ পৃ.,ক.৫), অবজারভার (পৃ.১,ক.২), ইন্ডিপেনডেন্ট (পৃ.১,ক.৬)।

৫। **রেলো আসছে আরও ৫০ কোচ এবং ৪ রিলিফ ক্রেইন : রেলমন্ত্রী**

ইন্দোনেশিয়া থেকে স্টিলের তৈরি ৫০টি যাত্রীবাহী কোচ এবং জার্মানি থেকে ৪টি রিলিফ ক্রেইন আনছে বাংলাদেশ রেলওয়ে। গতকাল ২০ জুন মঙ্গলবার রেলভবনে এ সংক্রান্ত দুটি চুক্তি স্বাক্ষরিত হয়। চুক্তি স্বাক্ষর অনুষ্ঠানে রেলমন্ত্রী মো. মুজিবুল হক বলেন, ইন্দোনেশিয়া থেকে আরও ২শ'টি এমজি কোচ আসবে। একই সাথে আরও দেড়শটি কোচ আনার প্রক্রিয়া চলছে। সব মিলে আগামী বছর যাত্রীবাহী কোচের আর কোনো সমস্যা থাকবে না। চুক্তি অনুযায়ী ২১২ কোটি ৮৭ লাখ টাকায় ইন্দোনেশিয়ার ইনকা পিটি ইন্ডাস্ট্রি কারিটা এপিআই স্টিলের তৈরি ৫০টি যাত্রীবাহী বগি সরবরাহ করবে আগামী দুই বছরের মধ্যে। এ চুক্তিতে স্বাক্ষর করেন রেলপথ বিভাগের পক্ষে রেলওয়ের অতিরিক্ত মহাপরিচালক (রোলিং স্টক) মো. সামসুজ্জামান এবং ইনকা পিটির পক্ষে আর আণ্ডস এইচ পুরনোমো। সূত্র-ইনকিলাব (শেষ পৃ.,ক.৩), ভোরের কাগজ (পৃ.৩,ক.১)।

৬। **পূর্বাচলে ৭০ হাজার ফ্ল্যাট নির্মাণ করা হবে : গণপূর্তমন্ত্রী**

**বস্তিবাসীদের জন্য ভাড়াভিত্তিক স্বল্প মূল্যের ফ্ল্যাট নির্মাণের কাজ চলছে**

গৃহায়ণ ও গণপূর্তমন্ত্রী ইঞ্জিনিয়ার মোশাররফ হোসেন বলেছেন, ঢাকার পূর্বাচলে আধুনিক স্মার্ট সিটি গড়ে তোলা হচ্ছে। এখানে ৭০ হাজার ফ্ল্যাট নির্মাণ করা হবে। সেখানে একটি আইকনিক টাওয়ার নির্মাণ করা হবে। শিগগিরই এর দরপত্র আহ্বান করা হবে। এ ছাড়া বিদেশি অর্থায়নে বিলম্বিত প্রকল্পে ১৪ হাজার ৪০টি ফ্ল্যাট নির্মাণের কাজ চলছে। আন্তর্জাতিক দরপত্রের মাধ্যমে মালয়েশিয়ার একটি কোম্পানি এ কাজটি পেয়েছে। আগামী এক মাসের মধ্যে এ প্রকল্পের কাজ শুরু হবে। এ ছাড়া ঢাকার বস্তিবাসীদের জন্য ভাড়াভিত্তিক স্বল্প মূল্যের ফ্ল্যাট নির্মাণের কাজ চলমান রয়েছে। গতকাল ২০ জুন মঙ্গলবার জাতীয় সংসদে প্রস্তাবিত বাজেটের ওপর সাধারণ আলোচনায় অংশ নিয়ে তিনি সংসদকে এ সব তথ্য জানান। সূত্র-ভোরের কাগজ (শেষ পৃ.,ক.২)।

৭। **পাহাড় ধসের ঘটনা এড়াতে পাহাড় কাটা বন্ধ করা হবে : ত্রাণমন্ত্রী**

দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী মায়া বলেছেন, ‘পাহাড়ধসের ঘটনা এড়াতে স্বল্প, মধ্য ও দীর্ঘমেয়াদি পরিকল্পনা নেওয়া হচ্ছে। পাহাড় কাটা ও বালু উত্তোলন বন্ধ করা হবে। ভূমিধসের জরিপ ও ম্যাপ তৈরি করা হবে’। গতকাল ২০ জুন মঙ্গলবার সচিবালয়ে মন্ত্রণালয়ের সভাকক্ষে দুর্যোগ ব্যবস্থাপনা সংক্রান্ত আন্তঃমন্ত্রণালয় সভা শেষে তিনি এসব তথ্য জানান। সূত্র-সমকাল (পৃ.৩,ক.৫), জনকণ্ঠ (পৃ.১,ক.২), অবজারভার (শেষ পৃ.,ক.৪)।

৮। **প্রধানমন্ত্রীর জাতিসংঘের সাধারণ পরিষদের ‘সার্কেল অব লিডার’ বৈঠকে আমন্ত্রণ জানানো হবে**

**জাতিসংঘের মহাসচিবের সাথে পররাষ্ট্র সচিবের সৌজন্য সাক্ষাৎ**

শান্তিরক্ষা কার্যক্রমে বিশেষ অবদান রাখার জন্য প্রধানমন্ত্রী শেখ হাসিনাকে আসন্ন জাতিসংঘ সাধারণ পরিষদের সময় অনুষ্ঠিতব্য ‘সার্কেল অব লিডার’ বৈঠকে আমন্ত্রণ জানানো হবে। জাতিসংঘের মহাসচিব এ্যান্টোনিও গুতের্রেজ এ তথ্য জানিয়েছেন। গতকাল ২০ জুন মঙ্গলবার নিউইয়র্কে জাতিসংঘের স্থায়ী মিশন থেকে পাঠানো এক বিজ্ঞপ্তিতে এ তথ্য জানানো হয়েছে। এতে বলা হয়, পররাষ্ট্র সচিব মো. শহীদুল হক গতকাল ২০ জুন মঙ্গলবার জাতিসংঘ সদর দফতরে জাতিসংঘের মহাসচিব এ্যান্টোনিও গুতের্রেজের সঙ্গে সৌজন্য সাক্ষাৎ করেন। এ বৈঠকে জাতিসংঘ মহাসচিব বাংলাদেশের অসামান্য অগ্রগতি বিশেষ করে অর্থনৈতিক প্রবৃদ্ধি, দুর্যোগ প্রতিরোধ সক্ষমতা ও ঝুঁকি ব্যবস্থাপনার ভূয়সী প্রশংসা করেন। সূত্র-জনকণ্ঠ (পৃ.১,ক.২), যুগান্তর (শেষ পৃ.,ক.১), ডেইলি সান (শেষ পৃ.,ক.১), নিউ এজ (শেষ পৃ.,ক.১)।

৯। **গণতন্ত্র, উন্নয়ন ও শান্তির পথে জয়ী হতে হলে চ্যালেঞ্জ মোকাবিলা করে এগিয়ে যেতে হবে : তথ্যমন্ত্রী**

**তথ্যমন্ত্রী হাসানুল হক ইনু বলেছেন, গণতন্ত্র, উন্নয়ন ও শান্তির পথে জয়ী হতে হলে নির্বাচন বানচালের**

চক্রান্ত প্রতিরোধ, যথাসময়ে নির্বাচন অনুষ্ঠান, অব্যাহত উন্নয়ন ও রাজাকার-জঙ্গি-জামায়াতিদের ক্ষমতার বাইরে রাখতে হবে। এই চার চ্যালেঞ্জ মোকাবিলা করেই বাংলাদেশকে সামনের দিকে এগিয়ে যেতে হবে। গতকাল ২০ জুন মঙ্গলবার রাজধানীর আগারগাঁওয়ে জাতীয় বেতার ভবনে বিসিএস তথ্য (প্রকৌশল) বেতার কর্মকর্তা কল্যাণ সমিতি আয়োজিত ইফতারপূর্ব আলোচনা সভায় প্রধান অতিথির বক্তৃতায় তিনি এসব কথা বলেন। সূত্র-সমকাল (পৃ.৫,ক.৪)।

#### ১০। আগামী শুক্র ও শনিবার পোশাক শিল্প এলাকার ব্যাংক খোলা

আসন্ন পবিত্র ঈদুল ফিতর উপলক্ষে দেশের পোশাক শিল্প এলাকায় অবস্থিত ব্যাংকের শাখাগুলো আগামী শুক্রবার অর্ধদিবস ও শনিবার পূর্ণদিবস খোলা থাকবে। আসন্ন ঈদে তৈরী পোশাক শিল্পে কর্মরত শ্রমিক-কর্মচারীদের বেতন, বোনাস ও অন্যান্য ভাতাদি পরিশোধের সুবিধার্থে এবং রপ্তানি বাণিজ্য সচল রাখার স্বার্থে এ সিদ্ধান্ত নেওয়া হয়েছে বলে জানিয়েছে বাংলাদেশ ব্যাংকের ডিপার্টমেন্ট অব অফ-সাইট সুপারভিশন। এছাড়া ঈদের ছুটির সময় এটিএম বুথে পর্যাপ্ত টাকা রাখা ও নিরাপত্তা নিশ্চিত করার নির্দেশ দিয়েছে কেন্দ্রীয় ব্যাংক। গতকাল ২০ জুন মঙ্গলবার এ বিষয়ে একটি পরিপত্র জারি করে সংশ্লিষ্টদের কাছে পাঠিয়েছে বাংলাদেশ ব্যাংকের কারেন্সি ম্যানেজমেন্ট বিভাগ। সূত্র-ইত্তেফাক (পৃ.১৮,ক.৫), যুগান্তর (পৃ.১৫,ক.৮), ইন্ডিপেনডেন্ট (পৃ.৯,ক.৫), নিউজ টুডে (পৃ.১,ক.১)।

#### ১১। ৩৮তম বিসিএসের আবেদন শুরু ১০ জুলাই : পদ ২০২৪টি

আগামী ১০ জুলাই থেকে ৩৮তম বিসিএসের জন্য আবেদন করা যাবে। আবেদনের শেষ সময় ১০ আগস্ট। এই বিসিএসের মাধ্যমে জনপ্রশাসনে ২ হাজার ২৪ জন ক্যাডার কর্মকর্তা নিয়োগ পাবেন। গতকাল ২০ জুন মঙ্গলবার সরকারি কর্মকমিশনের (পিএসসি) বৈঠকের পর এই বিজ্ঞপ্তি দেওয়া হয়। এবার প্রশাসন ক্যাডারে ৩০০, পুলিশ ক্যাডারে ১০০, আনসারে ৩১, পররাষ্ট্রে ১৭, নিরীক্ষা ও হিসাবে ১১টি পদসহ সাধারণ ক্যাডারে মোট ৫২০টি পদে বিজ্ঞপ্তি দেওয়া হয়েছে। এছাড়া স্বাস্থ্য ক্যাডারে ২২০ জন এবং কৃষি সম্প্রসারণ কর্মকর্তার ১৮৯টিসহ কারিগরি ও পেশাগত ক্যাডারে ৫৪৯টি এবং শিক্ষা ক্যাডারে ৯৫৫টি পদ থাকছে। তবে শেষ মুহূর্তে পদ কম-বেশি হতে পারে। এবারও অনলাইনে আবেদন করতে হবে। জাতীয় পরিচয়পত্র ছাড়া আবেদন করা যাবে না। এই বিসিএসে কেউ চাইলে ইংরেজিতেও পরীক্ষা দিতে পারবেন। সূত্র-প্রথম আলো (পৃ.৩,ক.৪), সংবাদ (পৃ.১,ক.১), ইন্ডিপেনডেন্ট (পৃ.২,ক.১), অবজারভার (পৃ.৩,ক.৬)।

#### সম্পাদকীয়

- ক. ইত্তেফাক, প্রথম আলো : সদরঘাট-গাবতলী বেড়িবাঁধ সড়কের উভয় পাশে অবৈধভাবে পাঁচশত দোকান ও বিভিন্ন স্থাপনা গড়ে ওঠায় সড়কটিতে তীব্র যানজট সৃষ্টি হচ্ছে উল্লেখ করে বেড়িবাঁধটিকে অবৈধ দলখমুক্ত ও ব্যবহার উপযোগী করাতে বিশেষ অভিযান পরিচালনা করতে ডিএনসিসি মেয়রের প্রতি আহ্বান।
- খ. সংবাদ : দেশের ৭২ শতাংশ ওষুধের দোকানেই লাইসেন্স নবায়ন করা হয়নি এ অভিযোগ আমলে নিয়ে এর জন্য দায়ীদের খুঁজে বের করে তাদের বিরুদ্ধে ব্যবস্থা নেওয়া ও ওষুধ ব্যবসায় নজরদারির জন্য একটি স্থায়ী সংস্থা গঠন করার সুপারিশ।
- গ. যুগান্তর, সংবাদ, ভোরের কাগজ, যায়যায়দিন : ঈদে ঘরে ফেরা মানুষের দুর্ভোগ লাঘবে যানজট ও দুর্ঘটনা রোধে সংশ্লিষ্টদের আন্তরিকভাবে কাজ করার ওপর গুরুত্বারোপ।
- ঘ. প্রথম আলো : তৈরি পোশাক খাতের শ্রমিকদের দ্রুত উৎসব ভাতা দিতে মালিকদের প্রতি আহ্বান।
- ঙ. সমকাল, যুগান্তর : চালের বাজারে অস্বাভাবিক মূল্য বৃদ্ধির লাগাম টেনে ধরতে সরকারের আমদানি শুল্কসহ বিভিন্ন শুল্ক হার কমানোর সিদ্ধান্ত বাস্তবায়িত হলে চালের দাম দ্রুত কমে আসবে বলে প্রত্যাশা ব্যক্ত।
- চ. এশিয়ান এজ : পাহাড় ধস প্রতিরোধে পাহাড়ে বেশি করে গাছ লাগাতে হবে এবং পাহাড় কাটা বন্ধ করার ওপর গুরুত্বারোপ।

- ছ. নিউ এজ : উচ্চ শিক্ষার উন্নয়নে বিশ্ববিদ্যালয়ে বিভিন্ন গবেষণা কর্মের জন্য বাজেট বাড়ানোর সুপারিশ।  
জ. ডেইলি স্টার, যায়যায়দিন : রাজধানীকে বাসযোগ্য করে তুলতে সুষ্ঠু উদ্যোগ গ্রহণ ও তার যথাযথ বাস্তবায়নের মধ্য দিয়ে জলাবদ্ধতার মতো ভয়াবহ পরিস্থিতি নিরসন করতে হবে বলে মত প্রকাশ।

#### উপ-সম্পাদকীয়

জনকণ্ঠ পত্রিকায় প্রকাশিত কলামে উল্লেখ করা হয়েছে, পাহাড়ধসের মতো পরিবেশ বিপর্যয় রোধে ও পরিবেশের উন্নয়ন করতে মহাপরিকল্পনার বিকল্প নেই।

#### নিবন্ধ ও ফিচার

ইত্তেফাক পত্রিকায় প্রকাশিত ‘আসছে পরিবেশবান্ধব পাটের পলিথিন’ শিরোনামের নিবন্ধে অভিমত প্রকাশ করা হয়েছে, পাটের পলিথিন উৎপাদনের যে সম্ভাবনা দেখা দিয়েছে তাকে পুরোপুরি কাজে লাগিয়ে একদিকে যেমন পরিবেশ ঠিক করতে হবে, অপরদিকে প্রাকৃতিক তত্ত্ব হিসেবে পাটের ব্যবহার বৃদ্ধি করে বিদেশে বাংলাদেশের পাটপণ্যের বাজার সৃষ্টি করে এ কৃষি পণ্যটির ভবিষ্যৎ উজ্জ্বল করা সম্ভব।

#

ডালিয়া/ফাহিমা/শুকলা/সাইদা/রশীদ/তানিয়া/২০১৭/৯.০০ ঘণ্টা